

جریدہ علیہ

مشيخت جليله اسلاميه نك جریده رسميه سیدر

صفر سنه ۱۳۴۰

عدد ۶۹

شمديلك آیدہ بر نشر اولنور

برنجی سنه

شعوری لاحق اولمش اوله حق ایدی . بوحالده آکا مستغرق اولان کیمسه یه اضافتله لسان مجاز ایله اتحاد ، لسان حقیقت ایله توحید دیرلر . بوحقایقک اوتیه سنده برطاقم اسرار واردرکه آکا طالمق جائز دکلدر .

ازمیرلی

اسماعیل مکی

(انوار شریعت)

۱

(طهارت)

اشکاردرکه طهارت ، نظافتدن عبارتدر شوخالده طهارت برصفت نزهت دیمکدر . طهارت ایکی نوعدرکه معنویه وحسیه در . طهارت معنویه اوچدر .

(۱) نفسک اخلاق مذمومه دن

(۲) عقلک دنس افکار وشهاتدن

(۳) سرک اغیاره نظردن نزهتیدر .

طهارت حسیه کنبجه : بوده نفوس النسانیه نك طبعاً وعادة استقدار واستکراه ایتدیکی شیلردن نزهتیدر .

طهارتک هرایکی نوعیده شرعیدر .

طهارت حسیه دخی ایکی نوعدر . نوع اول علی الاطلاق نظافتدر . نوع ثانی شرعاً اسباب موجبه مخصوصه مستند و محال معینه مخصوصه و واقع اولوب زیاده و یا نقصانی اولیان افعال معینه مخصوصه دن عبارتدر .

بونوع طهارتک شرعاً اوچ درلو اسمی واردرکه : وضوء ، غسل ، تیممدر .

بوطهارت اوچ شی ایله حاصل اولور بونلردن ایکیسی مجمع علیه بریسی مختلفه فیه در . مجمع علیه اولانلر ماء مطلق ایله طهارتدر . مختلف فیه اولانده نیتتمردر . اشبو طهارت بعضاً باشلی باشنه برعبادت اولورکه رسول الله صلی الله علیه وسلم افدمزک (نور علی نور) اولدیغنی بیان بیوردقلری وضوء علی الوضوءدر .

بعضاده معین برعبادت مشروعه و شرط صحت اولورکه عبادته مانع اولان شیای

رفع وازاله ایله فعل عبادتی استباحه ایلک کی . نته کیم رفع موانع ایله استباحه فعل عبادت ، طهارتک اساس تشریعیدر . یاخود افضلیتک شرطی اولور .
مطهراتک بعضیسی هم مانعی رفع همده فعلی اباحه ایدر . صوکی که بونده خلاف یوقدر . یاخود وضوء حقهده نییذمر کی که بوندهده خلاف یوقدر . مطهراتک بعضیسی ده ایچنده وقوعی مفروض اولان وقت ایچنده فعل معینک اباحه سنی موجب اولور ایسهده مع الخلاف اوله رق مانعی رفع ایتمز طوپراق کی .

بعض محققینه کوره طپراق ، وقت ایچنده اولدینی حالده قطعاً مانعی ده رفع ایدر . کرچه شارع بعدال تیمم صویک [۱] وجدانی حالنده طهارتی امر ایتمش ایسهده شارعک بوبابده کی امری ایکنجی بر حکم مخصوصدر . طپراقدن ماعدا اوله رق ارضدن مفارقت ایدن شیرده خلاف وارددر .

قال الله تعالى (یا ایها الذین آمنوا اذا قمتم الی الصلوة فاعسلوا وجوهکم وایدیکم الی المرافق وامسحوا برؤوسکم وارجلکم الی الکعبین وان کتم حنباً فاطهروا وان کتم مرضی او علی سفر اوجاء احد منکم من الغائط اولستم النساء فلم تجدوا ماء فتیمموا صعیداً طیباً فامسحوا بوجوهکم وایدیکم منه ما یرید الله لیجعل علیکم من حرج ولکن یرید لیطهرکم وینزل علیکم من السماء ماء لیطهرکم به ویذهب عنکم رجز الشیطان .

رجز ، حمزه نك قرائته کوره اولوب رجس مراد فیدر .
رجس ، بیسلکدر . صویسلکی ازاله ایدر . ظهور شرعی دخی شیطانک بیسلکی ازاله ایدر . طهارت حسیه شرعیه ایکیدر که عامه ، خاصه در (عامه) غسلدر که شخصک ذاتی استیلا ایدن فناء عامدنطولایدر . چونکه عندالوقاع کون ایله تلذذ جسد انسانینک هر نقطه سینه سرایت ایدر .

(خاصه) وضوءدر . بوده بعض اعضایی اغتسال ومسح ایله تخصیص ایدر . وضوء ، قوت ، کلام ، انفاص ، صدق ، تواضع ، حیاء ، سماع ، ثبات کی بعض مقامات علیه تنبیه و اشارتدر . بونلر قرب الی الله امرنده نتایج مهمه بی مفید اولان مقامات عالیه در .

(نیت)

مع الخلاف طهارتک صحتنده شرطدر . قال الله تعالى (فتیمموا صعیداً طیباً) یعنی بوعبادته استعمالنه مانع اوله حق نجاستدن آزاده اولان طپراغی قصد ایدیکز . حق تعالی

حضرت نلری بوقصدی صوبك طهارتی حقنده بیور مامشدر . وصو ایله اولان طهارتی ماء مقیده دكل ماء مطلقه حواله ایتمشدر . ماء مضاف کندیسنه مضاف اولدیغی شی ایله مقیددر .

(بونك سری)

بودر که صو سر حیاتدر کندیسنه قصد اولسون اولسون بذاته حیات بخش ایدر . طپراق ایسه کثیف و غیر ساری بر جسددر که روحی قصددر . بناءً علیه متمم پاك اولان بر طپراغی قصد و تحری ایتمز ایسه طپراق فائده بخش اولماز . قصد بر معنای روحانیدر . بوسبيله در که متمم طپراقد و یا (مع الخلاف) ارضده نیته مفتقر اولمشدر . ومع الخلاف صو ایله متوضئی نیته مفتقر اولمامشدر .

حق تعالی حضرت نلری (اغسلوا) بیورمش (تیمموا ماء طیباً) بیور مامشدر . کرچه صاحب رسالت صلی الله علیه وسلم (اعمال الاعمال بالنیات) بیور مامشدر . وضوء دخی بر عملدر . شوقدر که حدیث شریفده نیتك متعلق آنجق عملدر . صو ایسه عمل دکلدر . تیممده قصد و نیت طپراغه عائددر . ایمدی اشبو حدیث شریف موجبجه وضوء مجرد ماء ایله عمل قیلندن اولوق اعتباریله نیته افتقار ایدر . ماء عمله تابعدر : مقصود بالیه اولان ده عملدر . مع هذا تیممده کی قصد، صعید طیبه عائددر . آنکله عمل ایسه بر تابعدر که فعله شروع حالنده دیگر بر نیته افتقار ایدر . نته کم کرک وضوء ایله غسل کی عمل بالماء ، کرک اعمال مشروعه نیتك جمله سنده مأمور به اولان اخلاصه افتقار ایدر که اوده (مع الخلاف) نیتدن عبارتدر . قال الله تعالی (وما امروا الا لیعبدا الله مخلصین له الدین) نظم جلیله تیمموا الماء بیور مامشدر . او ایله بیوریش اولسیدی صو دخی بر روجه افتقار ایدردی . حالبوکه صو فی نفسه روحدر . چونکه صو بذاته اعطای حیات ایدر . قال تعالی (وجعلنا من الماء کل شیء حی) و ذاتاً هر شی حق تعالی نی حمد ایدر ک تسبیح ایدر . حی اولمیان شی تسبیح ایتمز . صو ، اشیاده اصل حیاتدر .

بوسبيله در که وضوء نیتك شرط صحت اولوب اولدیغی خصوصنده علماء شریعت بیننده اختلاف اولنمشدر .

کرچه وضوء نیتك شرط صحت اولدیغنه قائل اولمیان امام اعظم آنی غسل جنابتده شرط صحت اعتبار ایتمشدر . و بوعبادت لک ایکسی ده صو ایله در . صو هر ایکسی سنده سر حیاتدر . شوقدر که (جنابت) حد ذاتنده بر صودن عبارتدر . شرع شریف بونده کی دنس حکمیدن طهارتی اعتبار ایتمشدر . چونکه ماء جنابت اخلاطده اولان شیرله امتزاج

ایتمشدر . و چونکه جنابت ، دمدن استحالہ ایدن برصودر . بناءً علیہ سر حیاطدہ صویہ مشارکت ایتمشدر . و ہر ایکسی یکدیگرہ مزاحمہ ایتمشدر . صوایسہ یالکزر باشنہ حکم جنابتی ازالہ یہ قادر اولہ مامش و عند الاغتسال بروح مؤیدہ افتقار ایتمشدر . بناءً علیہ نیتک مساعده سنہ محتاج اولمشدر . بوصورتہ نیتک حکمی (کہ نیت بروح معنویدر) ایلہ صویک حکمی اجتماع ایدرک غسل ایلہ حکم جنابتی بلاشک ازالہ ایتمشدر . بوکا قائل اولان ابوحنیفہ ایلہ بوبادہ مشار الیہک رأینہ ذاہب اولانلردر .

ماء جنابت ، دمدن استحالہ ایدن برشی اولمق حسیلہ ماء مطلقک قوتی حائز اولمدیغنی نظر دقتہ آلان حسن بن جنی ماء جنابت ماء مطلقہ مقاومتدن عاجز اولدیغنی و بناءً علیہ نیتہ محتاج اولمہ جغنیہ قائل اولمشدر .

علمادن بویکی ذاتہ مخالفت ایدنلر مشار الیہمانک نقطۂ نظریہ انتقال ایدہ مامشدر .

(صولر)

صولر ایکی قسمدر . بریسی ماء مقطر در کہ غایت صافی و خالص در . بودہ یاغمرور صویدر . یاغمرور صوینی انحرۂ کثیفہدن استحالہ ایتمش و مع هذا آکا عارض اولان کثافت ، تقطیر ایلہ زائل اولمشدر .

بوصو علم شرعی لدنیدر کہ ریاضت و مجاہدہ و تخلیصدن حاصلدر . کشی کندی نفسنی بوصو ایلہ تطہیر ایتملندر .

ایکسجی صو ، لطافتدہ یاغمرور صوینک درجہ سنہ ارتقا ایدہ مامشدر کہ اودہ پیکارلرک قبولرک ، نہرلرک صویدر . زیرا بوصو کندیسندن نبعان و اوزرندن جریان ایلدیکی یردن آلدینی شیلرلہ امتزاج ایتمش اولہرق نبعان ایدر کہ طعمی مختلف اولور . بونک کیمی طاتلی کیمی طوزلی کیمی دہ آجیدر . یاغمرور صوینی ایسہ تک بر حال اوزرہ اولوب خالص ، خفیف ، لطیف ، وایچیمی قولای برصودر .

یاغمرور صویندن غیری صولر افکار صحیحہ ایلہ عقولک علومیدر . فکرندن مستفاد اولان علوم عقلیہ معروض تغیر و تحولدر . چونکہ علوم عقلیہ دائماً متفکرینک امرجہ سنہ تابعدر . چونکہ متفکر خیالندہ منتقش اولان مواد محسوسہ کونینہدن بشقہ هیچ برشیہ نظر ایتمز . علوم عقلیہ نک براہینی دہ مواد محسوسہدن ترتیب اولنور . بناءً علیہ عقلانک حق ناظر واحدک شیء واحد حقندہ ازمنہ مختلفہ دہ کی سوزلری مختلف اولور کہ امرجہ نک تخلیط و نشاتلرندہ اولان امشاجک اختلافنددر . بوصورتہ آنلرک فروع عقلیہ یہ

اساس عد ايتدكاري اصول دخي مختلف اولمشدر . علم لدني الهی ايسه مطاعمی مختلف اولسهده طعمی واحددر . علم لدنيك مطاعمی اختلاف ايدر كن بونلرك كيمي طيب كيمي ده اطيب اولور ايسهده اساس طبيده هپسي مساويدر . ايمدی علم لدني الهی شائبه كدردن خالصدر . زيرا كرك مزاج طبيعيتك كرك منبعلك حكمندن آزادهدر .

بوصورتله انبيا واولياء ايله مخبرعن الله اولان ذوات سائرهنك سوزلری هپ براولمشدر . آنلردن برينك سوزنده ديكرينك سوزينه نسبتله بعض زياده موجود اولور ايسهده اصلا نقصان وتخالف بولماز . بالعكس آنلرك هر بری ديكريني تصديق ايدر . نصلكه ياغمور صوبي حال نزولده مختلف اولماز .

آرتق طهارت قليهك محضا بو علم ايله اولمسی لزومی كنديلكنندن آشكار اولور . بو علم كه علم شرعيدر . بو علم شرعی كه ياغمور صوينه تشبيه ايدلمشدر .

كشی هپ بو علمه اعتبار واعتماد ايتلیدر . علم شرعی ايله قابنی تطهير ايمان نفسه خیرخواهلق ايتامش اولور . هپ علوم عقليه استناد ايتك ايتيانك كرك علمی كرك طهارت ذاتیهی صويك كنديسندن نبعان ايلديكي ارضه تابع اولور . كشی بويله اولان برصويك طائلسنی آجيسندن تفريق ايدوبيلير ايسه سليم الحاسه ديمكدر . شكري شسكرك حلاوتنده اولديني حالده اكل ، صهيحدر . فقط شكري صاری صبرك آجيلغنده اولديني حالده اكل غير صهيحدر . بو بر امر ذوقيدر كه دليل عقلي آنده فائده بخش اولماز . كشی طهارت قليهی ایچون علوم شرعیه تمسك ايدر ايسه آنك اخلاق وروحانيتي پاك اولور . نتهكيم صو ايله اعضاء سائرهسی پاك اولديني كبی .

كشينك برنجی طهارتی اويقودن قالدیني زمان اللرينی صو قابنه ادخال ايتهدن اول آنلری بيقامقدر .

كيجه اويقوسندن اويانيلديني زمان اول باول اللری بيقامهك لزومی بلا خلاقدر . اللر قوت وتصريفك محليدر بونلردن صولك طهارتی (لاحول) علميله صاعنكده طهارتی (لا قوة الا بالله العلي العظيم) علميلهدر .

اللر بخل وخست صفتك لازمی اولان قبض وامساكك محليدر بونلرك طهارتی جود وكرم وسخاء صفتك لازمی اولان بسط وانفاق ايلهدر .

كيجه اويقوسی كشينك عالم غيب علمندن كوندوز اويقوسی ده عالم شهادت علمندن غفلتيدر .

تغسل بدنندن صکیره استنجا واستجماره صره کلیر. استنجا ایله استجماری جمع، افراددن
فصلدر استنجا واستجماردنخی طهارتدرکه هم سنه هم قرآناً آنلره ترغیب اولمشدر استنجا
سواً تینده بولان نجاستدن تطهر ایچون استعمال ماءدر اذی محل ستر وصیانتدر نصل که
سواتین، باطن انسانیده بولان خبث واذانک محل اخراجیدر لر خبث باطنی باطن انسانی یه
عارض اولان افکار ردیئه ومضله در.

حدیث صحیحده (ان الشیطان یأتی الی الانسان فی قلبه فیقول له من خلق کذا من خلق
کذا حتی یقول فمن خلق الله) وارد اولمشدرکه شیطان انسانک قلبنه کلهرک اکا فلان شی
کیم خلق ایتدی فلان شی ده کیم خلق ایتدی دهرک سوزده باشلار اک نهایت الاهی کیم
خلق ایتدی دیر.

سواتین عورتیندر یعنی اصلاً ویا فرعاً دینه مضر اوله رق، انسانه عارض اوله حق
وسوسه لره مائلدر لر مخرج قبله بری خیره دیکری شره معطوف ایکی وجه واردرکه نکاح
وسفاحدر نجاست ماء قلیل اوزرینه وارد اولدقده آنی افساد ایدر بونک کبی شهه لر دخی
ضعیف الرأی اولان قبلر اوزرینه وارد اولدقده آنلری افسادایلر.

حالبوکه نجاست دکزه دوشمش اولسه آنده محو اولور علم واصل مسائل ایله مؤید
اولان قلوب قویه دخی بویه درکه شیطان انسی ویا جنی اول شهه لری علم الاهی ایله ریان
وسیراب اولان برکیمسه یه کتیردکده آنلرک قالینی آلتونه وقصد یرینی اکسیره قالب ایتمه نک
کیفیتی بیلیر چونکه آنک نزدنده علم لدنی الاهی واردر.
ایشته استنجا روحانینک سری بودر.

ایمدی متوضی استجمار ایدوب استنجا ایسه آنک طهارتی مقلدک طهارتیدر. جهره
جماعتدر یدالله جماعته برابرر جماعته مخالفت موجب هلاکدر. قورد آنجق سورودن
آیریلانی اکل ایدر استجمار اقلی اوچ اولق اوزره تک طاشلری طوبلامقدر الله تعالی
وتردر وتری سور بوصورتله وترداما عبدک مشهودی اولور. برده وتر طلب ثاروانتقادر
استجمارده شیطانک کشینک ایمانه القا ایلدیکی شهه لری آرامقدرکه طاشلری آنلرک خبثندن
بناک ایتک ایچون طوبلار.

ایمدی مقلد نفسنده برکونا شهه کورور ایسه اهل سنت اولان جماعته فرار ایدر
یدالله جماعته برابرر.

یدالله، اللهم تأیید وقوتیدر رسول الله صلی الله علیه وسلم دخی جماعتدن مفارقتی نهی

ایلمشدر . بو جهته در که اجماع امت ، حکم شرعی به دلالتده نص قرآنی و علم افاده ایدنه سنت متواتره دن اولان نص نبوی مقامنه قائم اولمشدر . ایشته طهارت مجوئه باینده استیجار بو صورتله در .

مضمضه

مضمضه ذکر حسن ایله اولمق لازم کلیر که آنکله نیمه ، غیبت ، فنا برسوزی جهراً سويلك کبی ذکر قییح زائل اولور . ایمدی کشینک مضمضه سی تلاوت قرآن ، ذکر الله اصلاح ذات البین ، امر بالمعروف نهی عن المنکر ایله اولمیدر . قال تعالی لایحب الله الجهر بالسوء من القول ، وقال مشاء بنمهم ، وقال لآخر فی کثیر من نجواهم الا من امر بصدقة او معروف او اصلاح بین الناس ، ایشته طهارت فم بودر . وبالعموم اعضای مکلفه نک وضوء غسل ، تیممی حقنده اجرایی لازم کلن آداب شرعیه نک مدخلی بودر کیشی جمیع اعضای مکلفه سنک طهارتنده بو مدخلدن کیره رک آنلرک عمومینی بوکا کوره تطهیر ایتلیدر کشینک مکلف اولان جمیع اعضای طهارت ، صلاة ، زکاة ، صیام ، حج کبی جمیع عبادت مشروعه ایله مکفدر . اعضای مکلفه دن هر برینی حقیقتنک طلب واستعدادینه کوره عبادات مذکوره ده استعمال ایتنک لازم کلیر حق تعالی حضر تتری هر کسی آکا اعطا ایلدیکی استعداد کوره مکلف قیلار اعطا ایلدیکی اعضای نصورتله استعمال ایده جکنی تعلیم و بیان ایلمشدر . اعضای مکلفه سکزدر که بعض اشخاصده اکسیک اولور ایسه ده هیچ بر شخصده زیاده اوله ماز .

۱ — کوز ۲ — قولاق ۳ — دیل ۴ — ال

۵ — قرن ۶ — فرج ۷ — آفاق ۸ — قلب در .

انسانده بونلردن فضله عضو اوله ماز . لکن بونلر نوع انسانینک بعض شخصلرنده تناقص ایدر . اعمی ، دیاسمز ، صاغر ، سقط کیمسه لر کبی .

انسانده موجود وصاغ اولان اعضای مکلفه به خطاب توجه ایدر .

اعضای مکلفه دن هر برینه تعلق ایدن تکالیف ، شارعک خطابندن معلوم اولور .

اعضای مکلفه ، بدنک تدبیریه مکلف اولان نفس مخاطبه نک آلتلری مثابه سنده درلر . انسان اعضای مکلفه سی آره سنده احکام عدالته رعایتدن مسؤلدر .

(وصل)

شایان دقت و اهمیت مسائلدن در که حق تعالی حضر تتری شخص انسانینک جمله سنده

بردن خطاب ایشددر . ظاهرینی باطنندن و یا باطنی ظاهرندن تفریق ایتماشددر . بویله ایکن اکثر ناس یالکز ظاهره متعلق احکام شرعیه یی معرفته صرف همت ایدوب باطنلرینه متعلق احکام شرعیه دن غفلت ایتماشددر .

حالبوکه اهل طریق الهمی ظواهرندن ده بواطندن ده بحث ایتماشلر وظواهره عاندهر هانکی بر حکم شرعی یی تعیین وایضاح ایدرکن اول حکم شرعینک باطنلرینه ده بر نسبی اولدیغنه قائل اولماشلر و بناءً علیه بالعموم احکام شرعیه یی بوموال اوزره آلوب تطبیق ایلماشلردر . وحق تعالی به هم ظاهراً هم باطناً مشروع قیلدینی باجمله احکام ایله عبادت ایتماشلر و اکثر ناس دوجار خسران ارلورکن انلر بوصورتله فائر اولماشلردر .

مع هذا بو ایکی طائفه نك آره سنده اوچنجی بر طائفه پیدا اولوب کندیسینی ضال و آخرلری ایچون باعث ضلال اولماشددر . بو طائفه احکام شرعیه یی باطنلرینه صرف ایتماشلر وظواهره عائد هیج بر حکم شرعی بر اقاماشددر . بو طائفه به باطنیه نامی ویریلور . بو طائفه نك مسدکنه سالک اولانلر اولبایده مختلف مذهبله ذاهب اولماشلردر .

امام ابو حامد غزالی (کتاب المستظهر) ده مذهب باطنیه نك بر قسمینی بیان وخطالرینی ایضاح و تشریح ایتماشددر . فی الحقیقه سعادت ، بتون معناسیله ظاهر ایله باطن بیتنی جمع ایتماکله درکه بوکا آنجق علماء الهمیه موافق اولماشددر .

کوکل ایسترکه بیوک بر کتاب یازلسون بوکتابده بالعموم مسائل شرعیه نك ظاهره عائد اولان جهتلری ذکر و بسط اولدقدن صکره انلردن هر برینک یانسه او مسئله نك باطن انسانی به متعلق اولان حکمی ده ایضاح ایدلسون که بو صورتله شرعک حکمی ظاهر وباطنه بردن ساری اولدینی پیشگاه ایضار عالمده آشکار اولسون کرچه اهل اللهک بتون مرام و غرضلری بوايسه ده حق تعالی حضر تلی هر کسه باب فهمی کشاد ایلدیکندن هر کس هر حکم شرعینک کندی باطننه تعلقنک وجهنی بیله من .

ایمدی بوراده یالکز طهارت ، صلاة ، زکاة ، صیام ، حج ، لاله الا الله محمد رسول الله صلی الله علیه وسلم ایله تلفظدن عبارت اولان عباداته عائد احکامک بیانیه اکتفا ایلورز . بونلر اسلامک اوزرینه بنا قیلندینی ارکان وقاعده لریدر . بونلر اوطه نك دیرکری مثابه سنده ده . اوطه بر مجموعدر . اوطه نك مدخلنده ایکی قنادر و اردرکه بونلر شهادتین ایله تلفظدر . اوطه نك دیرکری ده درتدرکه صلاة زکاة صیام محجدر . بو اوطه یی بنا وانشایه اعتنا ایدم که آنک ایچنه کیروب ساکن اولم و بوصورتله نفس جهنمک زمهریز و حرورندن امین اولم . قال

صلی الله علیه وسلم اشتکت النار الی ربها فقالت یارب اکل بعضی بعضاً فأذن لها بنفسین نفس فی الشتاء ونفس فی الصيف فما کان من سموم وحرور فهو من نفسها وما کان من برد وزمهریر فهو من نفسها)

انسانلر کندیلرینی شمسک حرارتندن هوانک برودتندن وقایه ایچون اوطه لر انشا ایتشلردر . عاقل اولان کیمسه دخی کندینی یوم قیامتده جهنمک ذکر اولسان ایکی نفسندن وقایه ایدمک بر اوطه انشا ایتلدر . زیرا یوم قیامتده جهنم فوران ایدر واعداء الله غیظندن تمیز ایدمک بر حالده اولارق موقفه قوشار کلیر . اولوقت بویه بر اوطه نک ایچنده اولان کیمسه یی حق تعالی حضرتلری جهنمک شر وسطوتندن وقایه ایدر . طهارت صحت صلاتک شرطی اولدیغندن آنی صلاتدن اول باب مخصوصده ذکر ایدیوروز .

آندن سوکره صره ایله صلاۃ ، زکاة ، صوم ، حج احکامنی ذکر ایدمک . بونلردن هر برینک امهات مسائلی ظاهرده اولان اسمیه بیان واحکام کلیه سی ایضاح ایدلدکن صکره عین مسئله نک باطنده کی حکمنه انتقال اولنه رق ظاهر و باطن مسائلی اتمام واکمال ایدیه جکدر . ومن الله التوفیق .

(بیان وایضاح)

طهارتک ظاهر آباطناً سبب تسمیه سی بالاده ایضاح ایدلک . بوراده آرتق ان شالله طهارتک احکامنی یعنی طهارت کیمک اوزرینه ونه زمان واجب اوله جعفی و طهارتک افعالی ونه ایله اینلنه جکنی نواقضنی ونه ایچون طهارت ایدلدیکنی ایضاح ایدمک . مع هذا بومسائل فقهیه یی تعمیق ایتیه جک . یالکز قارئ بومسائل حقننده کتب فقهیه یه مراجعتدن اغنا ایدمک قدرینی ذکر ایله اکتفا ایلیه جک . ۳۰ تموز ۱۳۳۷ سید شیب

جسارت جاهلانه

مجرد استبعاد ایله عالم لطیفی انکار ایله مک جاهلانه بر جسارتدن ، غافلانه بر جراتدن بشقه برشی دکدر . انسان نه قدر داهی وعالم اولسه صوک آکلایه بیلدیکی شی عجزی وجهلی وصوک واصل اولدینی درجه وله وحیرت درجه سیدر .